

性理大中

性理大中卷之四

錢唐應撝謙嗣寅父編集

河陽趙士麟玉峯父鑒定

儒紀

伊川程子

程子名頤。字正叔。明道之弟。舉進士。嘉祐四年。廷試報罷。遂不復試。呂申公判太學。請爲太學正。固辭。元豐八年。授汝州團練推官。西監教。辭。元祐初。秘省校書郎。召對。除通直郎。充崇政殿說書。八月。

兼判登聞鼓院。二年八月，以孔文仲言差管勾西監，上奏乞歸。五年正月丁父憂去官。七年服除，除直秘閣，判西監，再辭。以董敦逸言，改授管勾崇福宮。未拜。九年上初親政，申秘閣西監之命，再辭。紹聖間，以黨論放歸。四年十一月，編管涪州。徽宗卽位，移峽州。四年，以赦復宣德郎任，還居住。還洛十月，復通直郎。權西監。建中靖國二年五月，追所復官，依舊致仕。崇寧二年四月，有言其著書毀朝政，旨追毀出身以來文字，遂徙居龍門之南。五年，復

宣議郎致仕。大觀二年九月卒。年七十五。嘉定八年。賜諡正公。淳祐初。封伊川伯。

幼有高識。非禮不動。年十四五。與明道同受學於周濂溪。年十八。上書闕下。勸仁宗以王道爲心。生靈爲念。黜世俗之論。期非常之功。且乞召對。面陳所學。不報。

撝謙曰。十八卽上書。未免急躁。仁宗之不報。所以育才者甚厚。

間遊太學。時胡翼之方主教導。以顏子所好何學論。

試諸生得先生所試大驚。卽延見。處以學職。呂希哲與先生鄰。齋首以師禮事焉。旣而四方之士從遊者日益衆。太中公屢當得任。子恩輒推與族人熙寧間。近臣屢薦。自以爲學不足。不願仕也。

撝謙曰。此時應悔少年上書之失。

呂申公知蔡州。將行。言曰。伏見南省進士程頤。年三十四。有特立之操。出羣之姿。嘉祐四年。已與殿試。自後絕意進取。往來太學。諸生願得以爲師。臣方領國子監。親往敦請。卒不能屈。臣嘗與之語。洞明經術。通

古今治亂之要實有經世濟物之才。非同拘士曲儒。徒有偏長。使在朝廷。必爲國器。伏望特以不次旌用。哲宗嗣位。門下侍郎司馬光尚書左丞呂公著及西京留守韓絳上其行義於朝。諫官朱光庭亦極薦之。按溫公集與呂申公同薦劄子曰。臣等竊見河南處士程頤。力學好古。安貧守節。言必忠信。動遵禮義。年踰五十。不求仕進。真儒者之高蹈。聖世之逸民。伏望特加召命。擢以不次。足以矜式士類。裨益風化。又胡文定公文集云。是時諫官朱光庭又言。

頤道德純備。學問淵博。材資勁正。有中立不倚之風。識慮明徹。至知幾其神之妙。言行相顧而無擇。仁義在躬而不矜。若用斯人。俾當勸講。必能輔養聖德。啓迪天聰。一正君心。爲天下福。又謂頤究先王之蘊。達當世之務。乃天民之先覺。聖代之真儒。俾之日侍經筵。足以發揚聖訓。兼掌學校。足以丕變斯文。

十一月丁巳。授汝州團練推官。西京國子監教授。先生再辭。尋召赴闕。元祐初元三月。至京師。除校書郎。

辭曰。祖宗時布衣被召。自有故事。今臣未得入見。未敢祇命。王巖叟奏曰。伏聞聖恩。特除頤京官。仍與校書郎。然臣願陛下。一召見之。試以一言。問爲治之要。陛下遂可自觀其爲人。願抱道養德之日久。必有嘉言。以新聖聽。陛下一見而後。命之以官。則頤當之而無媿。陛下與之而不悔。授受之間。兩得之矣。召對太皇太后面諭。將除說書。辭不獲。始受西監之命。且上奏論經筵三事。其一以爲上富春秋。輔養爲急。宜選賢德以備講官。因使陪侍宿直。陳說道義。所以涵養

氣質薰陶德性。其二請上左右內侍宮官。皆選老成
重厚之人。不使侈靡之物。淺俗之言。接於耳目。仍置
經筵。祇應內臣十人。使俟上在宮中動息。以語講官。
其或小有違失。得以隨事規諫。其三請令宮講官坐
講。以養人主尊儒重道之心。寅畏祇懼之德。又曰。若
言可行。敢不就職。如不可用。願聽其辭。旣而命下。以
通直郎充崇政殿說書。再辭。乃受命。四月。例以暑熱
罷講。先生奏言。輔導少主。不宜疎略如此。乞令講官
以六參。日上殿。問起居。因得從容納誨。以輔上德。五

月差同孫覺顧臨及國子監長貳看詳國子監制。先生所定大槩以爲學校禮義相先之地。而月使之爭。殊非教養之道。請改試爲課。有所未至。則學官召而教之。更不考定高下。制尊賢堂。以延天下道德之士。鐫解額以去利誘。省繁文以專委任。勵行檢以厚風教。及置待賓吏師齋。立觀光法。如是者數十條。

是時禮部尚書胡宗愈謂先帝聚士以學。教人以經。三舍科條固已精密。宜切仍舊。因是深詆先生。謂不宜使在朝廷。

上疏太皇太后言。今日至大至急。爲宗社生民長久之計。是輔養上德。而輔養之道。非徒涉詩書。覽古今而已。要使跬步不離正人。乃可以涵養薰陶。成就聖德。今間日一講。解釋數行。爲益旣少。又自四月罷講。直至中秋。不接儒臣。殆非古人朝夕承弼之意。請自初秋。卽令講官輪日入侍。陳說義理。仍選臣僚家十一二歲子弟三人。侍上習業。

搗謙曰。此法非善。倘比一頑童。則社稷之憂。方大也。○伊川亦言。所選子弟。年纔十三。便令罷去。然

所習既久。直一宣名之力耳。誰能阻之。

且以邇英迫隘暑熱。恐於上體非宜。而講日宰臣史官皆入。使上不得舒泰悅懌。請自今一月。再講於崇政殿。然後宰臣史官入侍。餘日講於延和殿。則後楹垂簾。而太皇太后時一臨之。不唯省察主上進業。其於后德。未必無補。且使講官欲有所言。易以上達。所繫尤大。又講讀官例兼他職。請亦罷之。使得積誠意。以感上心。皆不報。差兼判鼓院。先生引前說。且言入談道德。出領訴訟。非用人體。再辭不受。

性理大全卷之四
疏曰。夫鐘怒而擊之則武。悲而擊之則哀。誠意之感而入也。告於人亦如是。古人所以齋戒而告君也。臣前後兩得進講。未嘗敢不宿齋預戒。潛思存誠。覲感動於上心。若使營營於職事。紛紛其思慮。待至上前。然後善其辭說。徒以頰舌感人。不亦淺乎。

二年。又上疏論延和講讀垂簾事。且乞時召講官。至簾前。問上進學次第。又奏邇英暑熱。乞就崇政延和殿。或他寬涼處講讀。給事中顧臨以殿上講讀爲不

可有旨。脩展邇英閣。先生復上疏。以爲脩展邇英。則臣所請遂矣。然祖宗以來。並是殿上坐講。自仁宗始就邇英。而講官立侍。蓋從一時之便耳。非若臨之意也。今臨之意。不過以尊君爲說。而不知尊君之道。若以其言爲是。則誤主上知見。臣職當輔導。不得不辨。在經筵。每當進講。必宿齋預戒。潛思存誠。冀以感悟上意。而其爲說。嘗於文義之外。反覆推門。歸之人主。上或服藥。卽日就醫官問起居。然入侍之際。容貌極莊。時文潞公以太師平章軍國重事。或侍立終日。不

懈上雖喻以少休勿去也。人或以問先生。君之嚴視。潞公之恭。孰爲得失。先生曰。潞公四朝大臣。事幼主。不得不恭。吾以布衣職輔導。亦不敢不自重也。嘗聞上在宮中。起行嗽水。必避螻蟻。因請之曰。有是乎。上曰。然。誠恐傷之耳。先生曰。願陛下推此心。以及四海。則天下幸甚。一日講罷未退。上忽起憑檻。戲折柳枝。先生進曰。方春發生。不可無故摧折。上不悅。所講書有容字。中人以黃覆之。曰。上藩邸嫌名也。先生講罷。進言曰。人主之勢。不患不尊。患臣下尊之太過。而驕。

心生耳。此皆近輩養成之。不可以不戒。請自今舊名嫌名皆勿復避。神宗之喪未除。而百官以冬至表賀。先生言節序變遷。時思方切。請改賀爲慰。及除喪。有司又將以開樂置宴。先生又奏請罷宴。曰除喪而用吉禮。則因事用樂可矣。今特設宴。是喜之也。聞後苑以金製水桶。問之。曰崇慶宮物也。先生曰。若上所御。則吾不敢不諫。

按孔文仲劾先生疏有曰。上德未有嗜好。而常啓以無近酒色。上意未有信向。而常開以勿近小人。

每至講罷。必曲爲卑佞附合之語。如曰。伏望陛下
燕閒之餘。深思臣之說。無忘臣之論。又如曰。臣不
敢仔細敷奏。慮煩聖聽。恐有所疑。伏乞非時特賜
宣問。容臣一一開陳。當陛下三年不言之時。頗無
日無此語。以感切上聽。

在職累月。不言祿。吏亦弗致。旣而諸公知之。俾戶部
特給焉。

舊例初入京官時。用下狀出給料錢曆。諸公牒戶
部問不支俸錢故。戶部索前任曆子。先生曰。某起

自草萊。無前在曆子。意謂朝廷起我。便當廩人繼粟。庖人繼肉也。見近思錄

又不爲妻求封。或問之曰。某起於草萊。三辭不獲。而後受命。今日乃爲妻求封乎。

問者范純甫。又問。今人陳乞恩例。義當然否。人皆以爲本分不爲害。先生曰。只爲而今士大夫道得个乞字。憤却動不動又是乞也。因問陳乞封父祖如何。先生曰。此事體又別。再三請益。但云其說甚長。待別時說。

撝謙曰。想先生意以爲此時待聘始出。實爲國師。傳雖封祖父。亦未可陳乞。待受恩旣久。遷轉別官。始隨臣子常例耳。

經筵承受張茂則。嘗招講官啜茶觀書。先生曰。吾平生不啜茶。不觀書。竟不往。潞公嘗與呂范諸公入侍。經筵。聞先生講說。退相與嘆曰。真侍講也。一時文士。歸其門者甚盛。而先生亦以天下自任。論議褒貶。無所顧避。由是同朝之士。有以文名世者。疾之如仇。國忌行香。先生令供素饌。蘇軾詰之曰。正叔不好佛。胡

爲食素先生曰。禮居喪不飲酒。不食肉。忌日喪之餘也。軾令具肉食。曰爲劉氏左袒。於是范淳夫輩食素。秦黃輩食肉。又明堂降赦。臣僚稱賀訖。兩省官欲往奠司馬光。時先生言曰。子於是日哭。則不歌。豈可賀赦纔了。却往弔喪。坐客有難之曰。子於是日哭。則不歌。不言歌。則不哭。今賀了却弔。於禮無害。軾遂以鄙語戲先生。衆皆大笑。

馮謙曰。吉凶異道。不得相干。歌咏之餘。適有凶哀。豈得不哭。然豈有豫知兩事。賀弔並行。此與梨園。

弟子何異

時呂申公爲相。凡事有疑。必質於先生。進退人材。二蘇疑先生有力。故極詆之。於是時人有洛蜀黨之議。一日赴講。會上瘡疹。不坐已累日。先生退詣宰臣。問上不御殿。知否。曰不知。先生曰。二聖臨朝。上不御殿。太皇不當獨坐。且人主有疾。而大臣不知。可乎。翌日宰臣以先生言奏。請問疾由。是亦多不悅。而諫議孔文仲因奏先生汙下儉巧。素無鄉行。經筵陳說。僭橫忘分。遍謁貴臣。歷造臺諫。騰口問亂。以償恩仇。致市

并目爲五鬼之魁。請放歸田里。以示典刑。差管勾西京國子監。

呂申公曰。文仲本以伉直稱。然恣不曉事。爲浮薄輩所使。以害善良。○後文仲知爲蘇軾所賣。發憤嘔血死。○范太史淳夫家傳。元祐九年。奏曰。臣伏見元祐之初。陛下召程頤對便殿。自布衣除崇政殿說書。天下之士皆謂得人。實爲希濶之美事。而纔及歲餘。卽以人言罷之。頤之經術行誼。天下共知。司馬光呂公著皆與頤相知二十餘年。然後舉

之。此二人者。非爲欺罔。以誤聖聰也。頤在經筵。切於皇帝進學。故其講說。語嘗繁多。草茅之人。一旦入朝。與人相接。不爲關防。未習朝廷事體。而言者。謂頤大佞大邪。貪黷。請求。奔走。交結。又謂頤欲以故舊。傾大臣。以意氣。役臺諫。其言皆誣妄。非實也。蓋當時諫官王巖叟。朱光庭。賈易。皆素推服頤之經行。故不知者。指以爲頤黨。陛下慎擇經筵之官。如頤之賢。乃足以輔導聖學。至如臣輩。叨備講職。實非敢望頤也。臣久欲爲頤一言。懷之累年。猶豫。

不果。使頤受誣罔之謗於公正之朝。臣每思之。不無愧也。今臣已乞去職。若復召頤勸講。必有補聖明。臣雖終老在外。無所憾矣。

先生既就職。再上奏。乞歸田里。曰。臣本布衣。因說書得朝官。今以罪罷。則所授官不當得。三年又請。皆不報。乃乞致仕。至再又不報。五年正月。丁太中公憂。去官七年。三省進呈。先生服除。欲與館職判檢院。時蘇轍執政。云。但恐不肯靖。簾中入其說。故先生不得復召。遂除直秘閣判西京國子監。先生再辭。極論儒者

進退之道。監察御史董敦逸奏。以爲有怨望輕躁語。改授管勾崇福宮。未拜。以疾尋醫去官。哲宗初親政。申秘閣西監之命。再辭不就。以朝廷議北郊失禮亦不見問故辭

撝謙曰此時或可暫起

紹聖間。以黨論放歸田里。四年十一月。編管涪州。謝良佐曰。是行也。良佐知之。乃族子公孫與邢恕之爲耳。先生曰。族子至愚。不足責。故人情厚。不敢疑。孟子既知天。焉用尤。臧氏先生被謫。時李邦直尹洛。令都監來見。先生纔出見之。便請上轎。先生欲略見叔母。

亦不許。莫知朝命云何。是夜宿於都監廳。明日差人管押成行。至龍門。邦直遣人餽銀百星。先生不受。旣歸。門人問何爲不受。先生曰。渠是時已與某不相知。豈可受。貶涪州。渡江中流。船幾覆。舟中人皆號哭。先生獨正襟安坐如常。已而及岸。同舟有老人問曰。當船危時。君獨無怖色。何也。曰。心存誠敬爾。至涪。註周易。與門弟子講學。不以爲憂。元符二年正月。易傳成。而序之。三年正月。徽宗卽位。移峽州。四月。以赦復宣德郎。任得歸。不以爲喜。還洛時。氣貌容色。髭髮皆勝。

平昔十月復通直郎權判西京國子監。旣受命卽謁告欲遷延爲尋醫計。旣而供職尹焞深疑之。先生曰。上初卽位。首被大恩。不如是何以仰承德意。然吾之不能仕。蓋已決矣。受一月之俸焉。然後唯吾所欲耳。建中靖國二年。追所復官。依舊致仕。崇寧二年。言者論其本因姦黨論薦得官。雖嘗明正罪罰。而敘復過優。今復著書非毀朝政。於是有旨追毀出身以來文字。其所著者。令監司覺察。范致虛言程某以邪說誆行惑亂衆聽。而張繹尹焞爲之羽翼。事下河南府體

究盡逐學徒。復隸黨籍。遷居龍興之南。止四方學者。
曰尊所聞。行所知可矣。不必及吾門也。崇寧三年。謂
張繹曰。吾受氣甚薄。三十而浸盛。四五十而後完。
今生七十二年。校其筋骨。無損也。繹曰。先生豈以受
氣之薄而厚爲保生耶。先生喟然曰。吾以忘生。徇欲
爲深恥。易傳成書已久。學者莫得傳授。或以爲請。曰。
自量精力未衰。尚覲有少進耳。其後寢疾。始以授尹
焞。張繹。

尹焞曰。語錄之類。出於學者所記。有工拙。蓋未能

無失也。先生用意唯在易傳。又云。門弟子請問易傳事一字之義。必再三命之。蓋其潛心甚久。未嘗容易下一字。

大觀二年九月庚午卒於家。疾革。門人進曰。先生平日所學。正今日要用。先生力疾微視曰。道著用便。不是其人。未出寢門。先生歿。先生常服蟹袍高帽簷劣半寸繫絲。曰。此野人之服也。深衣紳帶。清緣篆文。非禮勿視。非禮勿聽。非禮勿言。非禮勿動。

尹焞曰。先生衣雖紬素。冠襟必整。食雖簡儉。蔬飯必

潔太中年老。左右就養無違。以家事自任。悉力營辦。細事必親。贍給內外親族八十餘口。

初韓維與二先生善。屈致於穎昌。暇日同遊西湖。命諸子侍行。次有言貌不莊敬。先生回視責之曰。汝輩從長者行。敢笑語如此。韓氏孝謹之風衰矣。韓遂皆逐去之。一日與韓汎舟穎昌。有一官員上書謁持國。求知已。先生曰。只爲有不求者。不與。來求者與之。遂致人如此。持國稱善。久留韓所。韓蚤晚伴食。體貌加敬。一日韓密謂其子彬叔曰。先生遠來。無以爲意。我

嘗有黃金藥杵一重三十兩似可爲先生壽未敢遽言之我當以他事使汝侍食從容道吾意彬叔侍食如所戒試啓之先生曰頤與乃翁道義交故不遠而來奚以此爲詰朝遂歸持國謂其子曰我不敢言正爲此耳再三謝過而別

呂汲公以百緡遺先生先生辭之時族兄子公孫在旁謂先生曰勿爲已甚姑受之先生曰公之所以遺頤者以頤貧也公爲宰相能進天下之賢隨材而任之則天下受其賜也何獨頤貧也天下之貧者亦衆

矣。公帛固多。恐公不能周也。

君實嘗謂先生曰。欲除一人給事中。誰可爲者。先生曰。初若泛論人才。卻可。今旣如此。願雖有其人。何可言。君實曰。出於公口。入於光耳。又何害。先生終不言。門人王信伯曰。明道猶有謔語。若伊川則全無。問如何謔語。曰。明道聞司馬溫公解中庸。至人莫不飲食。鮮能知味。有疑遂止。笑曰。我將謂從天命之謂性。便疑了。伊川直是謹嚴。坐間無問尊卑長幼。莫不肅然。又曰。一日偶見秦少游。問天若知也。和天瘦。是公詞。

否。少游意伊川稱賞之。拱手遜謝。伊川云上穹尊嚴。安得易而侮之。少游面色駢然。

又曰。伊川四十以後。記性愈進。今人年長則健忘。豈可不知其故哉。

朝廷欲用游酢。蘇右丞沮止之。毀及伊川。宰相蘇子容曰。公未可如此。頌觀過其門者。無不肅也。

文潞公尹洛。先生時爲判監。一日府會。先生往赴。到客次。見樂人來呈樂語曲詞。先生訝之。問故。對曰。昨日得太師鈞旨。明日請程侍講。詞曲並要嚴謹。依禮。

法故先來呈富鄭公。司馬溫公居鄉里尤所尊禮。呂正獻公范忠宣公過洛必先來見。呂榮公兄弟與先生書必滌筆硯正衣冠然後寫其爲當時禮敬如此。先生旣沒。昔之門人高弟多已先亡。無有能形容其德美者。然先生嘗謂張繹曰。我昔狀明道先生之行。我之道蓋與明道同。異時有知我者。求之於此文可也。

先生曰。吾四十歲以前讀誦。五十以前研究其義。六十以前反覆紬繹。六十以後著書。

撝謙曰。四十以前。非不思也。但四十以後。省讀誦耳。

先生以易傳示門人。曰。只說得七分。學者須更自體究。

先生嘗曰。農夫祁寒暑雨。深耕易耨。播種五穀。吾得而食之。今百工技藝。作爲器用。吾得而用之。甲冑之士。被堅執銳。以守土宇。吾得而安之。卻如此閒過了日月。卽是天地間一蠹也。功澤又不及民。別事又做不得。唯有補緝聖人遺書。庶幾有補耳。

問先生曾定六禮。今已成未。曰。舊日作此。已及七分。後來被召入朝。旣在朝廷。則當行之。朝廷不當爲私書。旣而遭憂。又疾病數年。今始無事。更一二年可成也。曰。聞有五經解已成否。曰。唯易須親撰。諸經則關中諸公分去。以頤說撰成之。禮之名數。陝西諸公刪定。已送與呂與叔。與叔今死矣。不知其書安在也。然所定只禮之名數。若禮之文。亦非親作不可也。南方學者。從先生旣久。有歸者。或問曰。學者久從學於門。誰是最有得者。先生曰。豈敢便道有得處。且只

是指與他個路徑。令他尋將去。不錯了。已是忒大煞。
若夫自得。尤難其人。謂之得者。便是已有也。若論隨
力量而有見處。則不無其人也。

侯師聖云。游楊初見伊川。伊川瞑目而坐。二子侍立。
既覺。謂曰。賢輩尚在此乎。日既晚。且休矣。及出門。門
外雪深一尺。

明道嘗曰。異日能尊嚴師道者。吾弟也。若接引後學。
隨人材而成就之。則余不得讓焉。

和靖尹氏曰。焯年二十。方登先生之門。被教誘諄諄。

嘗得朱公揆所論雜說呈先生。問此書可觀否。先生留半月。一日請曰。前日所呈雜說如何。先生曰。願在何必觀此。若不得願心。只是記得他意。惇自是不敢復讀。

橫渠張子曰。伊川可如顏子。恐未必如顏子之無我。謝顯道曰。伊川才大。以之處大事。必不動聲色。指顧而集矣。或曰。人謂伊川守正則盡。通變不足。子之言若是何也。謝顯道曰。陝右錢以鐵。舊矣。有議更以銅者。已而會所鑄子不踰母。謂無利也。乃止。伊川聞之。

曰此乃國家之大利也。利多費省。私鑄者衆。費多利少。盜鑄者息。民不敢盜鑄。則權歸公上。非國家之大利乎。又有議增解鹽之直者。伊川曰。價平則鹽易賤。人人得食。無積而不售者。歲入必倍矣。增價則反是已。而果然。司馬公既相。薦伊川而起之。伊川曰。將累人矣。使韓富當國時。吾猶可以有行也。及司馬溫公大變熙豐。復祖宗之舊。伊川曰。役法當討論。未可輕改也。公不然之。旣而數年紛紛不能定。由是觀之。亦可以見其梗概矣。

紹興間。胡安國言。程頤修身行法。規矩準繩。獨出諸儒之表。雖崇寧間。曲加防禁。學者私相傳習。其後門人稍稍進用。傳者浸廣。士大夫爭相淬厲。而其間志利祿者。托其說以自售。分黨相排。衆論洶洶。深誚其徒。而乃上及於頤。竊以爲過矣。夫聖人之道。所以垂訓萬世。無非中庸。非有甚高難行之說。離世異俗之行。此誠不可易之至論也。然中庸之義。不明久矣。自頤兄弟始發明之。然後其義可思而得也。不然。則或謂高明所以處已。中庸所以接物。本末上下。析爲二

性理大全 卷之四 三
途而其義不明矣。士學宜師孔孟。此亦至論也。然孔
孟之道不傳久矣。自頤兄弟始發明之。而後其道可
學而至也。不然。則或以六經語孟之書。資口耳。取世
資以干祿。愈不得其門而入矣。今欲使學者蹈中庸
師孔孟。而禁使不得從頤之學。是入室而不由戶也。
不亦誤乎。

朱子贊曰。規員矩方。繩直準平。允矣君子。展也大成。
布帛之文。菽粟之味。知德者希。孰識其貴。

朱子曰。明道德性寬大。規模廣濶。伊川氣質剛方。文

理密察其道雖同而造德各異故明道嘗爲條例司官不以爲浼而伊川所作行狀不載其事明道猶謂青苗可且放過而伊川乃於西監一狀較計如此可謂不同矣但明道所處乃大賢以上事學者未至而輕議之恐失所守伊川所處雖高然實中人可以跂及學者只當以此爲法則庶乎其寡過矣

問程傳說得理也太多曰伊川求之太深嘗說三百八十四爻不可只作三百八十四爻解其說也好而今似他解時依舊只作得三百八十四般用

又曰。易傳明白無難看。但伊川以天下許多道理。散入八六十四卦中。若作易看。卽無意味。唯將來作事看。卽句句字字有用處。

撝謙曰。按明道生平。溫和勝於嚴毅。伊川生平。嚴毅勝於溫和。故人多喜明道而畏伊川。然觀明道教人。大抵不立經界。以正容。悟物爲上。其事君亦少作章疏。只是開陳詳說。欲以誠感上心。有所諫諍。疏入輒削藁。如言詩亦不下訓詁。有時只轉一兩字。吟咏而授人。平生未嘗註書。看來若無伊川。

則明道之澤一再傳而盡矣。譬之治田者。不立界樹。只靠讓路讓畔。一再傳後。子孫不知其處。故復得伊川。始承立得定。明道亦言。他日能尊師道。必吾弟也。然無明道開其前。末世人情。亦未肯遽附天之降畀。真無欠缺。如聖人亦然。明道似顏子。伊川似曾子。顏子若無若虛。天然和氣。驟難攀躋。夫子言。吾得回也。而門人益親。然傳聖人之道者。卒歸曾子。曾子篤恭弘毅。臨淵履水。嚴不奪之大節。守自反之大勇。慕子淵而畏子路。責子夏而病子

張凜然唯秋陽江漢之仰。一傳子思。再傳孟子。皆以剛大之質。充塞天地之氣。扶明此道。而聖教以立。不然。道廢已久矣。

又曰。天地生物。必用春夏之氣以始之。而秋冬之氣以成之。合二先生而四時之氣始備。

程子門人

尹和靖先生。名焞。字彥明。其先洛陽人。少孤。奉母陳氏以居。爲進士業。年二十。師事伊川。應舉。答策問。議誅元祐黨人。先生曰。噫。尚可以干祿乎哉。不對而出。

告於伊川曰。吾不復應進士舉矣。伊川曰。子有母在。先生歸告其母。母曰。吾知汝以善爲養。不知汝以祿養。於是先生退不復就舉。伊川教人專用敬以直內爲本。先生獨能力行之。因蘇昞見伊川。始到問爲學之方。伊川曰。公要知爲學。須是讀書。書不必多看。要知其約。多看而不知其約。書肆耳。願緣少時讀書食多。如今多忘了。須是將聖人言語玩味。入心記著。然後力去行之。自有所得。半年後。方教以大學西銘。一日看大學有所得。欲舉以示伊川。伊川問之。先生曰。

心廣體胖。偶只有所樂。伊川曰。到此和樂字也。著不得。與張繹友善。伊川歸自涪。繹始見。穎悟疏通。伊川極喜之。妻以族女。先生嘗因侍坐。請曰。張繹每聞先生語言。下解悟。焯聞先生語。須再三尋思。或更請問。然後解悟。然他日持守。恐繹不及焯。伊川然之。

伊川常言。晚得二士。伊川卒後。繹亦卒。不及有爲於世。朱子曰。思叔持守。不及和靖。乃伊川語。非特爲品藻二人。蓋有深意。和靖舉以語人。亦非自是。乃欲人識得先生意耳。若以其自是之嫌。而不言。

則大不是。將無處不窒礙矣。

一日讀易。至敬以直內處舉。問伊川。伊川深以爲然。且曰。不易見得如此。且更涵養。不要輕說。先生嘗言伊川教人。專令敬以直內。若用此理。則百事不敢輕爲。不敢妄作。不愧屋漏矣。習之既久。自然有所得也。溫州鮑若雨與鄉人十輩。久從伊川。伊川遣之。見先生。次日伊川曰。諸人謂子蘄學。不以教渠果否。先生曰。焯以諸公來依先生之門受學。焯豈敢輒爲他說。萬一有差。豈不悞他一生。伊川領之。嘗與范元長同。

性理大全卷之四
見伊川偶有事先起下階。伊川謂元長曰。君觀彥明他日必有用於世。自太觀中言者謂程頤倡爲異端。尹焞張繹爲之羽翼。事下河南府體究。學徒避不敢來。先生不爲之變。聲聞益盛。德益成。同門之士皆尊畏之。伊川曰。我死而不失其正者。尹氏子也。靖康初。徵到京師。懇辭還山。誥授和靖處士。

靖康元年。同知樞密院事。种師道奏。伏見河南府布衣尹焞。學專師古。行足勵俗。潛心允蹈。踰三十年。西都學者皆推仰之。未嘗應書。不求仕進。若蒙

名致。俾預講說。必有補益。召至京師。十月。賜號和靖處士以歸。

金人陷洛陽。舉家被禍。先生死。復蘇。逃於長安山中。轉徙四五年。長安陷。劉豫僭位。使人招之。先生夜逃去。徒步涉渭。久之。止於涪。紹興五年。侍讀范冲舉先生自代。

范冲奏曰。伏覩和靖處士尹焞。誠明之學。實有淵源。直方之行。動合規矩。靖康中。朝廷以布衣特起。累加津遣。既至京師。懇請還山。賜處士號。建炎中。

煇逃竄山谷。翟興爲河南鎮撫使。聞其名。遣使延聘。煇亦不就。今流落在蜀。臣與之遊處三十餘年。得其爲人。內行淳備。毫髮無玷。實爲鄉閭之所尊禮。士友之所矜式。迹其所得於已。表見於外。臣無能髣髴。舉以代臣。允愜公議。

授左宣教郎。充崇政殿說書。以疾辭。冲奏給五百金爲行資。遣漕臣奉詔至涪。親遣。六年始辭官就道。作文祭伊川而後行。至九江。聞陳公輔上疏攻毀程氏。四月上第八狀曰。學程氏者煇也。生事之二十年。令

又二十年矣。學之既專。自信甚篤。自少至老。居之甚安。使焯濫列經筵。其所敷繹僻陋之學。不過聞於師者。不唯無以發明經旨。又且仰惑聖聰。焯雖甚愚。敢偷一時之顯榮。不顧四方之公議。舍其所學。上欺君父。加以疾病日增。精神衰耗。決不能支持前進。乞令自便。訪藥求醫。免令道塗填委。溝壑會上。以右相張浚奏。召益急。至國門。復以疾辭。不許。使大臣存問慰勞。須病愈。必受命而後朝。至上前。又辭。上曰。卿尚可辭耶。朕渴卿久矣。知卿之從伊川也。俟卿講學。不敢

以有他。先生遂就職八年。除秘書少監。先生年已六十七矣。未幾力辭求去。上語參知政事劉大中曰。焞未論所學淵源。足爲後進矜式。班列得老成人。亦是朝廷氣象。乃以焞直徽猷閣。留侍經筵。轉太常少卿。權禮侍。兼侍講。會金議和。先生上奏曰。本朝鹵禍。亘古未聞。賴祖宗德澤之厚。陛下勤撫之至。所以億兆之心。無有離異。前年徽宗皇帝。寧德皇后。凶問遽來。莫究不豫之狀。天下之人。痛心疾首。而陛下方且降意屈心。迎奉梓宮。請問諱日爲事。遂使鹵意亦驕。謂

我無人再啓和議於今日。意欲潛圖混一。臣妾中國。陛下十二年勤撫之功。當於此決矣。况先王之禮。父母之讎。不與共戴天。兄弟之讎。不反兵。今信讎敵之詐謀。而覲其肯和。以紓目前之急。豈不失不共戴天反兵之意乎。又與宰相秦檜書。謂主上以父兄未返。降志辱身於九重之中。有年矣。未聞還二帝於沙漠。繼之梓宮崩問不詳。天下之人。痛恨切骨。方望相公有以革其已然。豈意爲之已甚乎。疏及書皆不報。於是先生固辭九年。以徽猷閣待制。提舉萬壽觀。兼侍

講又辭。且奏言。臣職在勸講。蔑有發明。期月之間。病告相繼。坐竊厚祿。無補聖聰。先聖有言。陳力就列。不能者止。此當去一也。臣起自草茅。誤膺名用。守道之語。形於訓詞。而臣貪戀寵榮。遂移素守。使朝廷非常。不次之舉。獲懷利苟得之人。此當去者二也。比嘗不量分守。言及國事。識見迂陋。已驗於今。跡其庸愚。豈堪時用。此當去者三也。臣自擢春官。未嘗供職。以疾乞去。更獲超遷。有何功勞。得以祗受。此當去者四也。國朝典法。揆之禮經。年至七十。皆當致仕。今臣年齒

已及。加以疾病。血氣旣衰。戒之在得。此當去者五也。臣聞聖君有從欲之仁。匹夫有莫奪之志。今臣有五當去之義。無一可留之理。乞檢會累奏。放歸田里。疏上。以焞提舉江州太平觀。引年告老。轉一官致仕。先生自入經筵。卽乞休致。朝廷以禮留之。浚鼎旣去。秦檜當國。見先生議和疏。及與檜書。已不樂。至是得求去之疏。遂不復留。十年。如紹興。居十二年。卒。年七十二。在經筵時。張魏公嘗問人。有不爲也。而後可以有爲。此孟子至論。先生曰。未是。張曰。何者爲至。先生曰。

好善優於天下爲至。張初不喜伊洛之學。先生此語實有發焉。先生莊正自持。不過於心。不欺闇室。存養氣質。成就充實。至於剛大。在瀘州一室名遂志齋。在涪陵。所居名習堂。在千福院。一室名六有齋。取橫渠言有教動有法。晝有爲。宵有得。息有養。瞬有存之意。一室名三畏齋。先生主一之功多。窮理之功少。然論程門之學。篤敬平實者。必以先生爲第一。

在朝班時。朝士迎天竺觀音於郊外。先生與往。有問何以迎觀音也。先生曰。衆人皆迎。惇安敢違衆。又問。

曰拜乎。曰固將拜也。曰不得已而拜之歟。抑誠拜也。曰彼亦賢者也。見賢斯誠敬而拜之矣。日看光明經一部。有問之。曰母命不敢違。

朱子曰。此是闕却諭父母於道一節。

門人徐度語及蘇氏使民戰栗議。問曰如何。先生斂然曰。訓經而欲新奇。無所不至矣。

和靖嘗曰。吾道須行至無內外。無思慮。方得。

撝謙曰。此言主一之純。動亦敬。靜亦敬。而近世陽明乃有無已發。無未發之論。其弊乃至執一。故注

元用問易傳切要處。和靖曰。體用一源。顯微無間。
後朱子以問延平。延平曰。此須是學者全理會得。
六十四卦三百八十四爻。方與說這話。不然。豈不
誤他。

朱子曰。先生晚歲片紙手書。聖賢所示治氣養心之
要。粘之屋壁。以自警戒。熹竊念前賢進脩不倦。死而
後已。其心炯炯。猶若可識。捧讀終篇。恍然自失。因以
自詔云。

又曰。和靖言經。雖以誦說而傳。亦以講解而陋。此言

深有味也。○又曰。和靖在程門。是十分鈍的。被他只就一个敬字做功夫。終做得成。○又曰。和靖紹興初入朝。滿朝注想。如待神明。然在經筵。亦無大開發處。時高宗好看山谷詩。尹曰。此人詩有何好處。陛下看此做甚麼。只說得此一語。

劉絢

程子

伊

曰。劉質夫久於其事。自小來便在此。

聖學不傳久矣。吾生百世之後。將明斯道。與斯學於既絕。力小任重而不懼其難者。亦有冀矣。以爲苟能使知之者廣。則用力者衆。何難之不易哉。遊吾門者。

衆矣。而信之篤。得之多。行之果。守之固。若質夫者。幾希。又曰。他人之學。敏則有矣。未易保也。質夫之志。吾無疑焉。

李顥 伊川曰。使學者視倣而信從。端伯質夫有力焉。二子才器相類。志尚如一。

呂大鈞 大鈞字和叔。於扶風張先生爲同年友。聞先生學。心悅誠服。賓賓然執弟子禮。扣請無倦。自是學者靡然知所向。日用躬行。必取張先生之法度。以爲宗範。丁諫議憂。自始喪。至於葬祭。一倣古儀所得。

爲者。而居喪之節。鉅細規矩於禮。雖昆弟共行之。而君特勉執之。彌謹。○作呂氏鄉約。

按和叔專從橫渠與叔始從橫渠。橫渠卒。乃東見二先生而卒業焉。

呂大臨。師祭文。子之學。博極羣書。妙達義理。如不出諸口。子之行。以聖賢爲法。其臨政事。愛民利物。若無能者。子之文章。幾及古人。薄而不爲。四者皆有以過人。而其命乃不偶於世。

游酢。龜山楊氏曰。游定夫與兄醇。俱以文行知名。

性理大全卷之四
三十一
於時所交皆天下豪英。定夫雖少。而一時老師宿儒。咸推先之。伊川以事至京師。一見謂其資可適道。時明道知扶溝縣。兄弟方以倡明道學爲已任。設庠序。聚邑人子弟教之。召定夫來職學事。定夫欣然往從之。得其微言。於是盡棄其學。學焉。

撝謙曰。觀定夫答呂居仁書。則其舍儒入禪。又不無負所師之意。

朱子曰。定夫清德重望。皎如日星。雖奴隸之賤。皆知之。其流風餘韻。足以師世範俗。

謝良佐

和靖尹氏曰。謝顯道習舉業。已知名。往扶溝見明道先生。受學。志甚篤。明道一旦謂之曰。爾輩在此相從。只是學某言語。故其學心口不相應。盍若行之。請問焉。曰。且靜坐。伊川每見人靜坐。便歎其善學。

朱子曰。上蔡爲人。英果明決。強力不倦。克已復禮。日有課程。所著論語說。及門人所記遺語。皆行於世。如以生意論仁。以實理論誠。以常惺惺論敬。以求是論窮理。其命意皆精當。而直指窮理居敬。爲入德之門。

則又最得明道教人之綱領。嘗宰德安府之應城。胡文定以典學使者行部過之。不敢問以職事。顧因介紹。請以弟子禮見。入門。見吏卒植立庭中。如土木偶人。肅然起敬。遂稟學焉。其同時及門之士。亦皆稱其言論閎肆。善啓發人。今讀其書。猶可想見也。某自少時。妄意爲學。卽賴先生之言。以發其趣。而平生所聞先生行事。又皆高邁卓絕。使人興起。凜然常懼其泯滅而無傳也。○明道以上蔡記誦爲玩物喪志。蓋爲其意不是。理會道理。只是誇多鬪靡。爲能若明道看。

史不蹉一字。則意思自別。此正爲已爲人之分。
謝子與伊川別一年。往見之。伊川曰。相別又一年。做
得甚功夫。謝曰。也只却得个矜字。○朱子曰。謝自謂
去得矜字。後來矜依舊未去。說道理好揚揚地。又曰。
如今人說道。愛從高妙處說。便入禪去。自上蔡以來
已然。

南軒張氏曰。呂晦叔言。上蔡自見二先生。爲克已之
學。有一研平生極愛惜。遂去之。然猶往來於心。其天
資最高尚。且如此。以見克已之難也。程椅因言。上蔡

性理大全 卷之四 三十一
自謂後來於器物之類置之。只爲合要用。却無健羨心。此工夫極至處。可謂勇矣。

楊時 明道在穎昌時。龜山先生因往從學。明道甚喜。每言曰。楊君最會得容易及歸。送之出門。謂坐客曰。吾道南矣。○伊川自涪歸。見學者凋落。多從佛學。獨先生與謝丈不變。因歎曰。學者多流於蕤翟矣。惟有楊謝二君長進。

爲謙曰。觀朱子之言。則二君亦未能不負伊川此語。

呂氏本中曰。龜山天資仁厚。寬大能容物。又不見其
涯涘。不爲崖異絕俗之行。以求世俗名譽。與人交始
終如一。性至孝。幼喪母。哀毀如成人。事繼母尤謹。熙
寧中旣舉進士得官。聞河南兩程先生之道。卽往從
學。旣歸。間居累年。沉浸經書。推廣師說。窮探力索。務
極其趣。涵蓄廣大。而不敢輕自肆也。本中嘗聞於先
輩長者。以爲明道先生溫然純粹。終身無疾言遽色。
先生實似之。

先生除邇英殿說書。知時勢將變。遂陳論政事。其略

曰。近日蠲除租稅。而廣濟軍以放稅降官。是詔令爲虛文耳。宜從前詔。茶租權法。宜少寬。東南州縣。均敷鹽鈔。計口而授。人何以堪。宜酌中立額。發運司宜給糴本。以復轉般之舊。和預買。宜損其數。而實支所買之直。燕雲之軍。宜退守內郡。以省轉輸之勞。燕雲之地。宜募邊民爲弓箭手。使習騎射。以殺常勝軍之勢。衛士天子爪牙。而分爲二三。宜循其舊。不可增損。凡十餘事。執政不能用。而寇騎已逼。則又言今日所急者。莫大於收人心。邊事之興。免夫之役。毒被海內。誤

國之罪。宜有所歸。西北聚斂。東南花石。其害尤甚。宿
姦巨猾。借應奉之名。豪奪民財。不可勝計。天下積憤。
鬱而不得發。幾二十年。欲致人和。去此三者。會淵聖
嗣位。公乞對曰。君臣一體。上皇痛自引咎。至託以倦
勤。避位而宰執敘遷。安受不辭。此何理也。城下之盟。
辱亦甚矣。主辱臣死。大臣宜任其責。而皆首爲竄亡
自全之計。陛下孤立。何賴焉。乞正典刑。爲臣子不忠
之戒。童貫爲三路總帥。棄軍而歸。置而不問。故梁方
平。何灌相繼逃去。大河天險。棄而不守。使寇奄至城。

下而朝廷不知。帥臣失職。莫甚於此。宜以軍法從事。防城所仍用閩人。提舉授以兵柄。此覆車之轍。不可復蹈。淵聖大喜。擢右諫議大夫。會朝廷以三鎮賂金。厚遺金帛講和而去。公言。河朔要藩。一旦棄之。使以二十州之地。貫吾腹中。距京城無藩籬之固。戎馬疾驅。不數日而至。此非經遠之謀。四方勤王之師。踰月而後集。使之無功而去。厚賜之。則無名。不與。則生怨。不可不慮也。聞三鎮之民。欲以死拒守。今若以兵躡之。使腹背受敵。宜可爲也。時議者多持兩端。遂失此。

機會後朝廷因太學生伏闕。慮其鼓亂。乃以先生兼國子祭酒。遂乞追奪王安石王爵。毀去配享之像。諫官馮澥上疏。詆先生有旨皆罷。

問龜山晚年出處不可曉。其名也。以蔡京然在朝廷亦無大建明。朱子曰。以今觀之。則可以追咎當時無大建明。若自家處之。不知當時所當建明者何事。或云。不過擇將相爲急。曰也。只好說。擇將相固是急。然不知當時有甚人可做。當時將只說种師道。相只說李伯紀。然固皆嘗用之矣。又况自家言之。彼亦未便。

見聽據當時事勢亦無可爲者。不知有大聖賢之才何如耳。○問龜山當時何意出來。曰龜山做人也。苟且。是時未免祿仕。故胡亂就之。苟可以少行其道。龜山之志也。然來得已不是。及至又無可爲者。只是說得那沒緊要的事。當此之時。苟有大力量。咄嗟間真能轉移天下之事。來得已不枉。旣不能然。又只是隨衆鶻突。○又曰。他當時一出。追奪荆公王爵。罷配享夫子。且欲毀劈三經板。士子不樂。遂相與聚問。三經有何不可。輒欲毀之。當時龜山亦謹避而已。○又曰。

龜山之出人多議之。惟胡文定之言曰：「當時若能聽用決須救得一半。」此語最公。

馮謙曰：「蔡京之薦龜山，以悔過畏禍而然。龜山之起，不爲過。以孔子救世之急，公山佛肸且欲往，况煌煌天子之名乎？起而執政，不見聽，則退可耳。」

馬伸真西山讀書記曰：「崇寧中，禁元祐學，姦人用事，出其黨爲諸路學使，專糾其事。伊川之門學者無幾，雖宿素從遊，間以趨利叛去。時中方自吏部求爲西京司法曹事，銳然爲親依之計。至則因張思叔求

見先生辭焉。時中曰：使伸得聞道，雖死何憾？况不至於死乎？先生聞而歎曰：此真有志者。遂引進之。自爾出入凡三年。公暇，雖風雨必一造焉。靖康初，爲御史。張邦昌僞命時，進狀，速令改正。易服歸省，奉迎康王。建炎中，以論汪黃誤國，貶濮州監酒。死。嘗曰：志士不忘在溝壑，勇士不忘喪其元。今日何時？溝壑乃吾死所也。故其臨事奮不顧身如此。又嘗曰：志在行道，使吾以富貴爲心，則爲富貴所累；使吾以妻子爲念，則爲妻子所累。是道不可行也。

呂希哲

家傳曰。正獻居家。簡重寡默。不以事物經

心。而申國夫人。性嚴有法度。雖甚愛公。然教公事事。循蹈規矩。甫十歲。祁寒暑雨。侍立終日。不命之坐。不敢坐也。日必冠帶。以見長者。平居雖天甚熱。在父母長者之側。不得去巾襪。縛袴衣服。唯謹。行步出入。無得入茶房酒肆。市井里巷之言。鄭衛之音。未嘗一經於耳。不正之書。非禮之色。未嘗一接於目。○始與伊川俱事胡公瑗。少程一二歲。察其學問淵源。非他人比。首以師禮事焉。○晚嘗言十餘年前。在楚州。橋壤。

墮水中時。覺心動。數年前大病。已稍稍勝前。今次疾病。全不動矣。○仙源嘗言與公爲夫婦。相處六十年。未嘗一旦有面赤。自少至老。雖衽席之上。未嘗戲笑。其餘門人。學行聞於時者甚衆。不能備錄。

問伊川門人如此其衆。不知何故。後來更無一人見得親切。或云。游楊亦不久親炙。朱子曰。也是諸人無頭無尾。不會盡心在上面也。各家去奔走仕宦。所以不能理會得透。如邵康節從頭到尾。竭終身之力。而後得之。雖其不能無偏。然就他這道理。所謂成而安。

矣。如茂叔先生資稟便較高。他也去仕宦。只就他所學。自是從合下直到後來。所以有成。某看來這道理。若不是操生盡死去理會。終不解得。○上蔡之學。初見其無礙。甚喜之。後細觀之。終不離禪的見解。如灑掃應對處。此只是小子之始學。程先生因發明雖始學。然其終之大者。亦不離乎此。上蔡於此類處。便說得大了。道理自是有大有小。有初有終。若如此說時。便是不安於其小者。初者。必知其中有所謂大者。方安爲之。如曾子三省處。皆只是實道理。上蔡於小

處說得亦大了。如游楊解書之類。多使聖人語來反。正如解不亦樂乎。便云學之不講爲憂。有朋友講習。豈不樂乎之類。亦不自在。大率諸公雖親見伊川。皆不得其師之說。○韓退之云。孔子之道大而能博。門弟子不能徧觀而盡識也。故學焉而皆得其性之所近。此說甚好。看來資質定了。其爲學也只就他資質。添得些小好而已。所以學貴公聽並觀。求一个是當處。不貴徒執己自用。今觀孔門諸弟子。只除了顏曾之外。其他說話。便皆有病。程子諸門人。上蔡有上蔡。

之病。龜山有龜山之病。和靖有和靖之病。無有無病者。問也是後來做功夫不到。曰也。合下見得不周。偏差了。又曰。而今假如親見聖人說話。盡傳得聖人之言。不差一字。若不得聖人之心。依舊差了。况猶不得其言。若能得聖人之心。則雖語言各別。不害其爲同。如曾子說話。比之孔子。又自不同。子思傳曾子之學。比之曾子。其言語亦自不同。孟子比之子思子。又自不同。然自孔子以後。得孔子之心者。唯曾子子思孟子而已。後來非無能言之士。如楊子雲法言。模倣論

語王仲淹中說亦模倣論語言愈似而去道益遠。及至程子方略明得四五十年爲得聖人之心。然一傳之門人則已皆失其真矣。其終卒歸於擇善固執明善誠身博文約禮而已。只是要人自去理會。○游楊謝三君子初皆學禪。後來餘禪猶在。故學之者都流於禪。游先生大是禪學。必是程先生當初說得太高了。他們只睥看上一截。少下面著實功夫。故流弊至此。或謂龜山恐不如此。曰只論語序可見。

撝謙曰以愚觀之。只恐不見上一截。若見上一截。

必不會差。

朱子曰。今只看論語一書。何嘗有懸空的說話。只爲漢儒一向尋求訓詁。更不著聖人意思。所以二程不得不發明道理。開示學者。使激昂向上。求聖人用心處。故放得稍高。

撫謙曰。今看來。只是唐以來承晉人之弊。一求性命。便入禪去。彼二家說得極高。程先生驟要引學者到平實。恐學者引不上。故放得稍高。而學者流弊。仍入於禪。